

Morning Dogri (NSD) National News Bulletin 29-04-2024

आकाशवाणी

- लोकसभा दे 6में गेड़ लेई अधिसूचना जारी होई, कन्नै गै नामांकन प्रक्रिया शुरू होई गेई ऐ। इस गेड़ तैहत 6 राज्यें ते 1 केन्द्र शासत प्रदेश च फैली दिएं 57 लोकसभा सीटें पर मतदान होग।
- लोकसभा चुनाएं च अपनी पार्टी दे मेदवारें लेई समर्थन हासल करने लेई बड्डे-बड्डे लीडर जोरें-शोरें कन्नै प्रचार प्रसार करा'रदे न।
- भारती मौसम विभाग नै आक्खेआ ऐ जे पच्छम बंगाल दे गंगा किनारे आले इलाकें च मती थमां बड़ी मती गर्मी पेई सकदी ऐ।
- महिला स्कीट च भारतीय खडारन महेश्वरी चौहान नै कतर दी दोहा च खेड्डी जा'रदी शॉटगन ओलंपिक क्वालीफिकेशन प्रतियोगिता च चांदी दा तगमा जित्तिथै भारत दी तरफा पैरिस ओलंपिक 2024 दा कोटा हासल करी लैता ऐ।
- आईपीएल क्रिकेट च जंदी रातीं एम.ए.चिदंबरम स्टेडियम च खेड्डे गेदे मैचे च चेन्नई सुपर किंग्स ने सनराईजर्स हैदराबाद गी 78एं रंजें कन्नै हराई दित्ता।

<><><><><><>

6th Phase

चुनां कमीशन नै लोकसभा चुनां 2024 दे 6में गेड़ लेई अधिसूचना जारी करी दित्ती ऐ। इस गेड़ लेई 6 राज्यें ते इक केन्द्र शासत प्रदेश च फैली दिएं 57 संसदीय सीटें पर चुनां होंगन। इस दरान दिल्ली दी सब्बै 7, हरियाणा दी सब्बै 10, उत्तर प्रदेश दी 14, बिहार ते पच्छम बंगाल दी 8-8, ओडिशा दी 6, झारखंड दी 4 सिटें पर मतदान होग। नामांकन भरने दी खीरी तरीक 6 मई होग ते कागजें-पत्रें दी जांच पड़ताल 7 मई गी होग ते मेदवार 9 मई गी अपना नामांकन वापस लेई सकदे न। मतदान 25 मई गी होग।

<><><><><><>

Uttar Pradesh

भारतीय जनता पार्टी दे वरिष्ठ लीडर ते केन्द्री मंत्री राजनाथ सिंह होर अज्ज उत्तर प्रदेश दी लखनऊ लोकसभा सीटै थमां अपना नामांकन भरगंन। पैहले ओह लखनऊ च रोड शो करगंन ते फही अपना नामांकन भरगंन। नामांकन दरान बीजेपी दे वरिष्ठ लीडर ते उत्तराखंड दे मुख्यमंत्री पुष्कर सिंह दामी होर होरने पार्टी लीडरें कन्नै उत्थें मजूद होंगन। बीजेपी दी इक होर नेता समृति ईरानी बी उत्तर प्रदेश दी अमेठी लोकसभा सीटै थमां अपना नामांकन भरगंन। उंदे कन्नै इस मौके पर मध्यप्रदेश दे मुख्यमंत्री मोहन यादव होर मजूद होंगन। 2019 च होए दे लोकसभा चुनाएं च समृति ईरानी नै अदू दे कांग्रेस अध्यक्ष राहुल गांधी होरें गी हराया हा। तोआई बहुजन समाज पार्टी नै लोकसभा चुनाएं लेई पार्टी मेदवारें दी इक होर सूचि जारी कीती ऐ। पार्टी नै अमेठी थमां रवि प्रकाश मोर्या गी टिकट दित्ती ऐ। पार्टी ते सबीना अंसारी गी आजमगढ़ ते सईद दानिश गी संत कबीर नगर लोकसभा सीटै थमां अपना मेदवार घोषत कीता ऐ।

<><><><><><>

Delhi Polls

दिल्ली दिएं 7 लोकसभा सीटें लेई नामजदगिएं आली प्रक्रिया अज्जै थमां शुरू होग। मन्नेआ जा'रदा ऐ जे इनें सीटें लेई सिद्दा मकाबला बीजेपी, आम आदमी पार्टी ते कांग्रेस दे गठबंधन बश्कार होग। बीजेपी नै पिछले दऊं चुनाएं च एह 7 दियां 7 सीटां जित्तियां हियां। नामजदगियां दाखल करने दी प्रक्रिया गी बवस्था बनाने लेई सब्बै लोड़चदे बंदोबस्त कीते गेदे न। 6 मई तगर हर रोज दिने 11 बजे शा दपैहरी बाद 3 बजे तगर नामजदगी आले कागद दाखल कीते जाई सकदे न।

<><><><><><>

Campaign

लोकसभा चुनाएं लेई प्रचार ऐल्ले जोरें-शोरें चलै करदा ऐ ते बक्ख-बक्ख पार्टिएं दे वरिष्ठ लीडर अपन मेदवारें लेई समर्थन हासल करने लेई मुख्य भरै च रैलियां ते रोड शो करा करदे न। प्रधानमंत्री ते बीजेपी दे वरिष्ठ नेता नरेन्द्र मोदी होरें जंदे रोज कर्नाटक च सिरसी, देवांगिरी, बेल्लारी ते बेलागावी च जनसभाएं गी संबोधत कीता।

श्री मोदी होरें आक्खेआ जे पिछले 10एं बरें च उंदी सरकारै करसान उत्पादक संगठनें दे राएं करसानें दी मदाद उत्पादक संगठन राएं लौहके करसानें दी लागत गी घट्ट करने ते कृषि उपज आस्तै बजार खोलने च मदद कीती ऐ। उनें राज्य गी कांग्रेस सरकार पर प्रधानमंत्री कृषि करसान योजना राएं करसानें गी दित्ते जाने आले 4 जहार रपे च कटौती करने दा अरोप लाया। प्रधानमंत्री होरें लोकें गी 7 मई गी खरी मती च बाहर आइयै वोट पाने दी अपील कीती। तोआई बीजेपी दे वरिष्ठ नेता राजनाथ सिंह होरें गुजरात दे आनंद जिने च चुनावी रैली कीती। उनें आक्खेआ जे कोई बी ताकत भारत गी 2047 तगर विकसित राष्ट्र बनने थमां नेई रोक़ी सकदी। तोआई कांग्रेस पार्टी दे वरिष्ठ नेता राहुल गांधी होरें ओडिशा च प्रचार कीता। उनें आक्खेआ जेगर उंदी पार्टी हकूमत च आई जा तां ओह बेरोजगार नौजवानें गी नौकरियां देंगन।

<><><><><><><><>

Shah Bihar

भारतीय जनता पार्टी दे वरिष्ठ लीडर ते केन्द्री मंत्री अमित शाह अज्ज बिहार झांझरपुर ते बेगुसराय च दऊं जनसभाएं गी संबोधत करगंन। पैहली जनसभा झांझरपुर लोकसभा सीट च नारहिया थाहर ते दूई जनसभा बेगुसराय च जी.डी.कालेज थाहर होग। झांझरपुर जनसभा च बिहार दे मुखमंत्री नितिश कुमार होर बी मजूद होंगन।

<><><><><><><><>

Assam Amit Shah

केन्द्री गृहमंत्री ते बीजेपी दे वरिष्ठ नेता अमित शाह होर अज्ज संजा गुवाहाटी च इक रोड शो करगंन। असम दे मुखमंत्री हेमंता बिस्वा सरमा होर बी इस मौके पर उदे कन्नै होंगन। बीजेपी नै बड़ी मती प्रतिष्ठा आली गुवाहाटी लोकसभा सीट थमां साबका डिप्टी मेयर बिजुली कलिता मेढही होरें गी चुनाव मैदान च तोआरे दा ऐ। इस सीट लेई त्रिये गेड़ तैहत वोट पोआए जाने न। तोआई कांग्रेस नै मीरा बोरठाकुर गोस्वामी होरें गी इससै सीट पर चुनाव मैदान च तोआरे दा ऐ। साढ़े संवाददाता मूजब होरने बरोधी पाटिएं जिआं कांग्रेस ते एआईयूडीएफ बी अज्ज त्रिये गेड़ दे चुनाव लेई प्रचार करगंन। इस गेड़ तैहत असम च गुवाहाटी सीट दे कन्नै बारपेटा, कोकराझार ते धुबरी सीटें पर बी वोट पोआए जाने न।

<><><><><><><><>

IMD

भारतीय मौसम विभाग नै पच्छिम बंगाल दे गंगा कंडे आले इलाकें, बिहार, ओडिशा ते झारखंड च अगले त्रऊं दिनें तोड़ी बड़ी मती लूह चलने दी पेशगोई कीती ऐ। एह्दे इलावा रेयालसीमा, कर्नाटक दे अंदरूनी इलाके, तमिलनाडू, आंध्रप्रदेश, तेलंगाना, केरल ते पूर्वी उत्तर प्रदेश च बड़ी मती गर्मी पौने दे असार न। मौसम विभाग मूजब अगले 24एं घैंटे तोड़ी पूर्वी भारत च तापमान च इक थमां 2 डिग्री सैल्सियस दा बाद्धा होई सकदा ऐ। इआं पच्छिम मध्यप्रदेश, विदर्भ ते छत्तीसगढ़ दे किश इलाकें च हल्की बरखा पेई सकदी ऐ।

<><><><><><>

Kashmir Accident

कश्मीर घाटी च कल संजा श्रीनगर लेह जरनैली शिड़कै पर सैलानिएं गी लेइयै जा'रदी इक गड्डी दे गगनगीर सोनामर्ग इलाके च शिड़कै पर रूलकियै सिंध नाले च जाई पौने दे बाद चलाए गेदे तुपाई ते बचाह अभियान दरान चऊं जनें दियां लोथां बरामद करी लैतियां गेदियां न। अधिकारिएं मूजब हादसे बारे जानकारी थ्होंदे गै पुलस, फौज ते फौजी दी 34 असम राईफल्स, ट्रैफिक पुलस ग्रामीण, सिविल प्रशासन, मकामी लोकें, एसडीआरएफ ते एनडीआरएफ नै रलियै बचाह अभियान चलाया। मगरा तेज बरखा ते मौसम बड़ा मता खराब होने दे बाद अभियान रोकने तगर 4 लोथां बरामद करी लैतियां गेदियां हियां। उपराज्यपाल मनोज सिन्हा होरें सोनामर्ग हादसे च होए दे जानी नुक्सान पर दुख प्रगट करदे होई प्रभावतें गी नियमें मूजब हर मुमकिन सहायता मदाद देने दा निर्देश जारी कीता ऐ।

<><><><><><>

Olympic Quota

महिलाएं दी स्टीक च माहेश्वरी शॉटगन ओलंपिक क्वालीफिकेशन प्रतियोगिता च चांदी दा तगमा जित्तियै भारत दी तरफा ओलंपिक 2024 दा कोटा सुरक्षत करी लैता ऐ। फाइनल च कल 6 नशानेबाजें चा शडे 4 नशानेबाज गै कोटा हासल करने दे जोग हे। जिसलै कजाकिस्तान दे असेम ओरिनबे 5मीं थाहरै पर हारी गे ते अजरबैजान दी रिगिना मेफता खेत दीनोवा 6मीं थाहरै पर रेइयां, पही माहेश्वरी ते स्वीडन दी क्वालीफिकेशन लीडर विक्टोरिया लार्सन लेई दऊं ओलंपिक कोटें दी तसदीक होई गई।

नशानेबाजी च एह भारत आस्तै 21मां ओलंपिक कोटा ते शॉटगन च 5मां कोटा ऐ।

<><><><><><>

IPL

आईपीएल क्रिकेट च कल रातीं चेन्नई दे एम.ए.चिदंबरम स्टेडियम च खेड्डे गेदे मैच च चेन्नई सुपर किंग्स नै सनराईजर्स हैदराबाद गी 78 रंजें कन्नै हराई दित्ता। चेन्नई दी तरफा तुषार देशपांडे नै 4 विकटां लैतियां ते मथीशा पथिराना दी 2 महत्वपूर्ण विकटां लेइयै सनराईजर्स हैदराबाद गी 18 ओवरें ते 5 गेंदें च 134 रंजें पर समेटी दित्ता। एह्दे शा पैहले बल्लेबाजी करने लेई उतरी दी चेन्नई सुपर किंग्स दी टीमै 20एं ओवरें च 3 विकटें दे नुक्सान पर 212 रंजें बनाए। कप्तान ऋतुराज गायकवाड़ नै 54एं गेंदें च 98 रंज बनाए। जिसलै कि डेरिल मिशेल नै 32 गेंदें च 52 रंज बनाए। अज्ज कोलकाता दे ईडन गार्डन च कोलकाता नाईट राईडस दा मकाबला दिल्ली कैपिटल्स कन्नै होग। एह मैच अज्ज संजा साढत्रे 7 बजे शुरू होग।

<><><><><><>